

SAVEZ KLIZAČKIH SPORTOVA FEDERACIJE BOSNE I HERCEGOVINE

## REGISTRACIONI PRAVILNIK

Sarajevo, 29.07.2010.

## OSNOVNE ODREDBE

### Član 1

Ovim Pravilnikom uređuje se postupak i uslovi registracije klizačkih klubova i klizača kao članova klizačkih klubova u Federaciji Bosne i Hercegovine pri Savezu klizačkih sportova Federacije Bosne i Hercegovine (u daljnjem tekstu: SKSFBiH)

### Član 2

Pod klizačkim klubovima podrazumijevaju se: klubovi za umjetničko klizanje, sinhrono klizanje i brzo klizanje na kratke staze (short-track) kao i kombinovani klubovi.

Pod klizačima se podrazumijevaju članovi klizačkih klubova koji nastupaju ili namjeravaju nastupati na takmičenjima koja se organizuju i održavaju prema pravilima SKSFBiH i Saveza klizačkih sportova Bosne i Hercegovine.

Pod registracijom klizača podrazumijeva se prva registracija klizača za određeni klub, produženje registracije klizača po isteku sezone za isti klub, promjena članstva klizača za drugi klub koji je registrovan u SKSFBiH.

### Član 3

Odluku o registraciji klizačkog kluba u SKSFBiH donosi Skupština SKSFBiH na osnovu zahtjeva klizačkog kluba o čijoj se registraciji odlučuje.

Odluku o prvoj registraciji pojedinog klizača za određeni klub i promjeni članstva klizača za drugi klub donosi Upravni odbor na osnovu zahtjeva kluba za koji se klizač namjerava registrovati.

Na osnovu odluka iz stava 1. i 2. ovog člana registraciju provodi generalni sekretar SKSFBiH.

Produženje registracije klizača po isteku klizačke sezone za isti klub provodi generalni sekretar SKSFBiH na osnovu ovjerenog popisa članova kluba čija se registracija produžuje i dokaza o ljekarskom pregledu, a za koje produženje nije potrebna nikakva posebna odluka SKSFBiH.

Svaku registraciju iz stava 1 i 2. ovog člana te produženje registracije iz stava 4. ovog člana SKSFBiH je dužan provesti najkasnije u roku od 10 dana od dana prijema zahtjeva za registraciju odnosno ovjerenog popisa članova kluba i svih potrebnih priloga propisanih ovim Pravilnikom.

Generalni sekretar SKSFBiH je dužan voditi poseban registracioni spisak za klizače kluba. SKSFBiH je dužan o svakoj odluci o registraciji obavijestiti sve osobe na koje se pojedina registracija odnosi (klizače kluba, prethodni i novi klub i klizača) u roku od pet dana od dana donošenja odluke o registraciji.

### Član 4

Uz zahtjev za registraciju klub je obavezan dostaviti:

- dokaz o registraciji kluba pri nadležnom organu uprave,
- Statut kluba,
- Zapisnik s posljednje Skupštine kluba,

- Imena predsjednika, sekretara i članova Upravnog odbora kluba,
- Dokaz o obezbijedenim osnovnim materijalnim uslovima za rad i djelovanje:
  - Ugovor ili predugovor s trenerom određene grane sporta za koju se registruje i to trener sa licencom ili fakultetom na kojem ima predmet klizanje i sa sportskom biografijom, te plan sredstava od kojih ce biti plaćana nadoknada/plata treneru za dvije godine unaprijed
  - Plan rada i dokaz o obezbijedenim sredstvima za najam leda za 1 sezonu.
  - Potpisana izjava o prihvatanju ISU Code of Ethics (Etičkog koda).

#### Član 5

Svaki klizač mora biti registrovan kao član kluba.

Registracija klizača vrijedi dok klizač ili klub ne donese odluku o prestanku članstva.

Bez valjane registracije i dokaza o ljekarskom pregledu u skladu sa odredbama ovog Pravilnika klizač ne može nastupiti na domaćim takmičenjima koja se organizuju i održavaju prema pravilima SKSFBiH i Saveza klizačkih sportova Bosne i Hercegovine te na međunarodnim takmičenjima za koja prijavu vrši Savez klizačkih sportova Bosne i Hercegovine.

#### Član 6

Uz zahtjev za registraciju klizača klub je dužan dostaviti:

- Ime, prezime i očevo (ili majčino) ime klizača,
- Mjesto i datum rođenja,
- Jedinstveni matični broj,
- Podatke o eventualnom ranijem članstvu,
- Fotografiju 3x4 cm,
- Kategoriju klizača.
- Dokaz o ljekarskom pregledu.

Za strane državljanke klub dostavlja podatke propisane Pravilnikom ISU-a.

#### Član 7

Po obavljenoj registraciji, SKSFBiH izdaje klubu Potvrdu koja sadrži:

- Broj potvrde,
- Ime i prezime klizača,
- Mjesto i datum rođenja,
- Ime kluba za koji je klizač registrovan,
- Datum registracije,
- Pečat i potpis ovlaštene osobe SKSFBiH.

### **PRODUŽENJE REGISTRACIJE KLIZAČA**

#### Član 8

Produženje registracije klizača generalni sekretar SKSFBiH provodi automatski početkom svake klizačke sezone.

Svaki klub registrovan u SKSFBiH dužan je prije početka klizačke sezone (01.07.) dostaviti generalni sekretaru SKSFBiH popis klizača i kategoriju svojih članova čiju registraciju

namjerava produžiti, ovjeren od strane Predsjednika ili sekretara kluba bez čije ovjere se takav popis neće smatrati valjanim te dokaz o ljekarskom pregledu za klizače sa popisa.

#### Član 9

U SKSFBiH se obavlja registracija za sve kategorije.

#### Član 10

Klizač član kluba za kojeg klub nije zatražio produženje registracije može zatražiti istupnicu i biti registrovan za drugi klub ako je ispunio svoje obaveze u skladu sa članom 13 ovog Pravilnika.

### **PROMJENA KLUPSKOG ČLANSTVA KLIZAČA**

#### Član 11

Promjena klupskog članstva klizača obavlja se od 01.05-01.06. za sljedeću klizačku sezonu.

Upravni odbor može odobriti promjene klupskog članstva i van ovog termina.

#### Član 12

Klizač koji želi promijeniti klupsko članstvo prelazom u drugi klub dužan je podnijeti pisani zahtjev svom klubu.

Zahtjev za promjenom klupskog članstva smatraće se uredno dostavljenim klubu ako je predan klubu neposredno na protokol ili predan na dostavu preporučenom pošiljkom na adresu na koju poštu službeno klubu dostavlja SKSFBiH.

Danom dostave zahtjeva klubu smatraće se danom predaje zahtjeva na zapisnik odnosno danom predaje zahtjeva pošti radi dostave preporučenom pošiljkom.

U slučaju da ne postoje opravdani razlozi propisani ovim Pravilnikom za uskraćivanje izdavanja istupnice klizaču, klub je dužan izdati istupnicu klizaču u roku od 15 dana od dana prijema zahtjeva.

#### Član 13

Klub je ovlašten uskratiti izdavanje istupnice klizaču radi promjene klupskog članstva u sljedećim slučajevima:

- a) ako je klizač vezan važećim ugovorom zaključenim s klubom i ovjerenim od strane SKSFBiH,
- b) ako klizač ima neispunjene obveze prema klubu koje proizlaze iz njihovog međusobnog ugovornog odnosa ili iz važećih propisa kluba (npr. dugovanje novčanih sredstava po bilo kojoj osnovi ili sportske ili druge klupske opreme),
- c) ako je klizač prije podnošenja zahtjeva za promjenom klupskog članstva suspendovan ili kažnjen konačnom odlukom nadležnog klupskog tijela ili se protiv njega vodi klupski disciplinski postupak u skladu sa važećim aktima kluba, SKSFBiH ili Saveza klizačkih sportova Bosne i Hercegovine koje je klub dužan primjenjivati.

#### Član 14

U slučaju uskraćivanja izdavanja istupnice klizaču klub je dužan o tom uskraćivanju obavijesti klizača i SKSFBiH u pisanom obliku u roku od 15 dana od dana prijema zahtjeva

klizača za promjenom klupskog članstva.

Na način dostave pisanog obaviještenja iz stava 1. ovog člana SKSFBiH primijenit će se odredba člana 12. st. 4. ovog Pravilnika.

U pisanom obaviještenju iz st. 1. ovog člana klub je dužan precizno navesti razloge uskraćivanja izdavanja istupnice i uslove pod kojima je spreman izdati istupnicu klizaču, a primjerak obavijesti klub je dužan dostaviti SKSFBiH.

#### Član 15

U slučaju da klub nije izvršio uskraćivanje izdavanja istupnice u skladu sa članom 14. ovog Pravilnika ili nije izdao istupnicu klizaču protivno odredbi člana 12. st. 4. ovog Pravilnika smatraće se da klizač nema nikakvih obaveza prema klubu i da je njegov prelaz u drugi klub slobodan, a SKSFBiH će uredno izvršiti registraciju klizača za drugi klub.

Pri svakoj valjanoj promjeni klupskog članstva svakog pojedinog klizača i njegove registracije za novi klub u skladu sa odredbama ovog Pravilnika klub je dužan dostaviti SKSFBiH potvrdu za tog klizača najkasnije do zadnjeg dana roka za registraciju.

#### Član 16

Prilikom promjene klupskog članstva klizača zahtjev za registraciju klizača u SKSFBiH podnosi novi klub.

Zahtjevu za registraciju iz st. 1. ovog člana novi klub je dužan priložiti:

- a) istupnicu prethodnog kluba klizača,
- b) zahtjev za promjenom klupskog članstva prethodnom klubu s dokazom o izvršenoj dostavi zahtjeva prethodnom klubu – samo ako prethodni klub nije izdao istupnicu u skladu sa članku 12. st. 5. ovog pravilnika,

Klizač može u istoj klizačkoj sezoni najviše dva puta promijeniti klupsko članstvo.

#### Član 17

Klizač ima pravo nastupa odmah u sljedećim slučajevima:

- kada se u SKSFBiH registruje prvi put,
- kada se registruje nakon što najmanje dvije godine (48 mjeseci) nije nastupao ni za jedan klub u zemlji ili inostranstvu,
- kada se iz inostranstva vraća u klub iz kojeg je otišao u inostranstvo,
- kada se dva kluba udružuju,
- kada dolazi iz kluba koji je prestao djelovati,

U svim ostalim slučajevima kao i u slučaju promjene klupskog članstva klizač stiče pravo nastupa osmog dana od provedene registracije.

#### Član 18

Klizač koji nije nastupao ni za jedan klub u zemlji i inostranstvu najmanje dvije godine (48 mjeseci), registruje se bez istupnice i ima pravo nastupa odmah nakon registracije.

Klizač odgovara za vjerodostojnost podataka u zahtjevu za registraciju. U slučaju da

je registrovan na osnovu neistinitih podataka, biće kažnjen u skladu sa odlukom nadležnog tijela SKSFBiH.

#### Član 19

Protiv odluke o registraciji može se uložiti prigovor.

Prigovor se može uložiti u roku od 15 dana od dana prijema obavještenja o odluci o registraciji.

O prigovoru odlučuje Upravni odbor SKSFBiH. Upravni odbor je dužan donijeti odluku o prigovoru u roku od 15 dana od dana prijema prigovora. Protiv odluke Upravnog odbora dopuštena je žalba o kojoj odlučuje Skupština SKSFBiH.

Skupština SKSFBiH je dužna donijeti odluku o žalbi u roku od 30 dana od dana prijema žalbe.

Odluka Skupštine o žalbi je konačna i izvršna.

#### Član 20

Za vrijeme trajanja postupka po prigovoru, odnosno žalbenog postupka klizač nema pravo nastupa ni za jedan klub.

Klizač stiče pravo nastupa osmi dan po konačnosti odluke o registraciji.

#### Član 21

Klizač ne može preći i nastupiti za inostrani klub bez pismene saglasnosti svog kluba i dozvole SKSFBiH i Saveza klizačkih sportova Bosne i Hercegovine.

#### Član 22

Ako to dopuštaju propozicije takmičenja, klizač može pojačati drugi klub na takmičenju u inostranstvu. Za to je potrebna saglasnost kluba za koji je klizač registrovan, SKSFBiH i Saveza klizačkih sportova Bosne i Hercegovine.

#### Član 23

Strani državljanin, registrovan u skladu sa odredbama ovog Pravilnika punopravni je član kluba.

Strani državljanin u istoj klizačkoj sezoni može nastupiti samo za jedan klub.

### ZAVRŠNE ODREDBE

#### Član 24

Ovaj Registracioni pravilnik donosi Skupština SKSFBiH, a stupa na snagu danom donošenja.

Predsjednik  
Dževad Tirak

Izmjene Registracionog pravilnik usvojene je na Skupštini SKSFBiH, održanoj 20.06.2013. godine.